

**UMNO minta penjelasan kerajaan negeri
Utusan Online
05 Mei, 2012**

SHAH ALAM 4 Mei - UMNO Selangor mendesak kerajaan negeri memberi penjelasan berhubung dakwaan membiayai dan sokongan kepada sebuah pertubuhan mahasiswa untuk melaksanakan gerakan menggulingkan kerajaan.

Ketua Penerangannya, Abdul Shukor Idrus berkata, penjelasan itu harus dibuat susulan laporan media mengatakan kerajaan negeri mengadakan memorandum persefahaman (MoU) dengan pertubuhan haram Kumpulan Aktivis Mahasiswa Independen (KAMI), Januari lalu.

Berdasarkan laporan itu, katanya, MoU tersebut dibuat antara kerajaan negeri yang diwakili Exconya, Dr. Xavier Jayakumar dengan Timbalan Presiden KAMI, Khalid Mohd. Ismath.

Menerusi MoU itu, jelas beliau, kerajaan negeri membantu secara aktif aktiviti akademik, sosial dan kemasyarakatan mahasiswa Universiti Teknologi Mara (UiTM) melalui pertubuhan haram tersebut.

"Persoalannya, bagaimana kerajaan negeri boleh mengadakan MoU dengan sebuah pertubuhan haram. Saya difahamkan, pertubuhan itu tidak berdaftar dengan UiTM dan ia bukan pertubuhan mewakili mahasiswa universiti tersebut.

"Paling meragukan, berdasarkan laporan media, pertubuhan itu juga didapati terlibat aktiviti demonstrasi memansuhkan pinjaman Perbadanan Tabung Pendidikan Tinggi Nasional di Dataran Merdeka," katanya di sini hari ini.

"Begitu juga dengan demonstrasi Bersih 3.0 baru-baru ini, Khalid turut dikatakan terlibat dalam demonstrasi tersebut yang membawa kepada insiden keganasan," katanya di sini hari ini.

Justeru, kata beliau, pihaknya mendesak kerajaan negeri agar memberi penjelasan mengenai sokongan mereka terhadap pertubuhan haram itu termasuk menyatakan secara terperinci jenis bantuan serta jumlah dana yang disalurkan kepada pertubuhan itu.

Dalam pada itu, Abdul Shukor menegaskan, sekiranya kerajaan negeri ada menyalurkan bantuan serta dana kepada pertubuhan haram itu untuk mengadakan aktiviti demonstrasi itu, ia jelas satu tindakan yang tidak wajar selain kemungkinan berlaku penyalahgunaan peruntukan wang rakyat negeri ini.

Katanya, jika kerajaan negeri bertanggungjawab, mereka sepatutnya membantu untuk meningkatkan kualiti mahasiswa dalam bidang pendidikan, menghormati undang-undang serta keamanan di negara ini.

"Namun, melihat MoU yang mereka adakan dengan pertubuhan tidak sah itu, kita merasakan ia tidak membawa apa-apa kebaikan kepada golongan mahasiswa di negeri ini. Sebaliknya, ia dilihat satu permainan politik dengan menggunakan mahasiswa untuk mencapai cita-cita mereka.

"Apa yang berlaku sebenarnya ialah mahasiswa telah dipergunakan untuk menjalankan gerakan menentang dan menjatuhkan kerajaan yang dipilih oleh rakyat," ujarnya.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0505&pub=Utusan_Malaysia&sec=Politik&pg=po_09.htm